



ル 6
2529
19



門 儿呂8
號 2529
卷 49-19

吉林通志卷四十七

學校志四 學署 學額

學署

吉林府教授署在

文廟西明倫堂後

吉林外紀

雍正四年覆准增設奉天府永

吉州學正一員

會典事例二百九十四

光緒七年改升府教授

正室三楹東西廂各三楹明倫堂三楹尊經閣三楹

學冊

尊經閣嘉慶十四年將軍秀林捐建奉天學政茹棻

奏請頒

內板經籍於各學藏皮閣中

聖諭廣訓一部

欽定周易折中一部

御纂周易述義一部

欽定書經傳說彙纂一部

欽定詩經傳說彙纂一部

御纂詩義折中一部

欽定周官義疏一部

欽定儀禮義疏一部

欽定春秋傳說彙纂一部

欽定春秋直解一部

御註孝經一部

御纂孝經集註一部

十三經註疏各一部

御批資治通鑑綱目一部

御纂朱子全書一部

御纂性理精義一部

欽定康熙字典一部

欽定子史精華一部

欽定佩文韻府一部

御選古文淵鑑一部

御選唐宋文醕一部

御選唐宋詩醕一部

欽定四書文一部

御論一本 道光三年頒發

欽定學政全書 道光五年頒發

盛京通志二套 以上俱舊貯書籍

二十四史各一部

遼金元三史國語解一部

遼史拾遺一部

補元史藝文志一本

元史國語解一部

補元史氏族表一部 以上俱光緒十年巡道顧肇熙增貯

伊通州訓導光緒八年設學署未建

敦化縣訓導光緒八年設學署未建

長春府教授署在

文廟西偏同治十一年將軍宗室奕榕奏設訓導勅建

衙署光緒十五年改升教授明倫堂三楹內宅三楹

及前後翼室共十八楹 册報

農安縣訓導光緒十六年設學署未建

伯都訥廳訓導署雍正四年覆准增設長甯縣教諭

一員嗣裁

會典事例二百九十四

同治十一年將軍宗室奕榕

奏設訓導勅建衙署

冊報

賓州廳教諭署光緒八年設官十七年署同知趙宗

翰捐建

五常廳教諭光緒八年設學署未建

雙城廳訓導光緒八年設學署未建

學制

順治九年題准刊立卧碑置於明倫堂之左曉示生

員

朝廷建立學校選取生員免其丁糧厚以廩膳設學院

學道學官以教之各衙門官以禮相待全取養成賢

才以供

朝廷之用諸生皆當上報

國恩下立人品所有教條開列於後 一生員之家父

母賢智者子當受教或有非為者子既讀書明理當

再三懇告使父母不陷於危亡 一生員立志當學

為忠臣清官書史所載忠清事蹟務須互相講究凡

利國愛民之事更宜留心 一生員居心忠厚正直

讀書方有實用出仕必作良吏若心術邪刻讀書必

無成就爲官必取禍患行害人之事者往往自殺其身常宜思省 一生員不可干求官長交結勢要希圖進身若果心善德全上天知之必加以福 一生員當愛身忍性凡有司官衙門不可輕入卽有切己之事只許家人代告不許干與他人詞訟他人亦不許牽連生員作證 一爲學當尊敬先生若講說皆須誠心聽受如有未明從容再問毋妄行辨難爲師亦當盡心教訓勿致怠惰 一軍民一切利病不許生員上書陳言如有一言建白以違制論黜革治罪 一生員不許結黨多人立盟結社把持

官府武斷鄉曲所作文字不許妄行刊刻違者聽提

調官治罪

會典事例三百一十一

康熙二十九年議准學宮關係文教凡官民等經過

者皆下車馬並禁於學宮內放馬污踐

學政全書三

康熙三十九年議准直省奉有

欽頒

上諭十六條每月朔望地方官宣讀講說化導百姓今士子

亦應訓飭恭請

御製教條發直省學宮每月朔望令儒學教官傳集該學生員宣讀訓飭務令遵守如有不遵者責令教官并地

方官詳革從重治罪

會典事例
三百十一

康熙四十一年

御製訓飭士子文頒行直省各學

國家建立學校原以興行教化作育人材典至渥也朕臨御以來隆重師儒加意庠序近復慎簡學使釐剔弊端務期風教修明賢才蔚起庶幾棧樸作人之意乃比年士習未端儒效罕著雖由內外臣工奉行未能盡善亦由爾諸生積痼已久猝難改易之故也茲特親製訓言再加警飭爾諸生其敬聽之從來學者先立品行次及文學學術事功原委有敘爾諸生幼聞庭訓長立宮牆朝夕誦讀甯無

究心必也躬修實踐砥礪廉隅敦孝順以事親秉忠貞以立志窮經考業勿雜荒誕之談取友親師悉化驕盈之氣文章歸於醇雅毋事浮華軌度式於規繩最防蕩軼子衿佻達自昔所譏苟行止有虧雖讀書何益若夫宅心弗淑行已多愆或蜚語流言挾制官長或隱糧包訟出入公門或唆撥姦猾欺孤凌弱或招呼羽類結社要盟乃如之人名教不容鄉黨勿齒縱幸脫褫扑濫竊章縫返之於衷甯無愧乎况夫鄉會科名乃掄才大典關繫尤鉅士子果有真才實學何患困不逢時顧乃標榜虛名暗通聲氣夤緣詭遇罔顧身家又或改竄鄉貫希圖進取囂陵騰沸網利

營私種種弊端深可痛恨且夫士子出身之始尤貴以正若茲厥初拜獻便已作奸犯科則異時敗檢踰閑何所不至又安望其秉公持正爲國家宣猷樹績膺後先疏附之選哉朕用嘉惠爾等故不禁反復惓惓頒茲訓言爾等務共體朕心恪遵明訓一切痛加改省爭自濯磨積行勤學以圖上進國家三年登造束帛弓旌不特爾身有榮卽爾祖父亦增光寵矣逢時得志甯俟他求哉若仍視爲具文玩愒勿警毀方躍冶暴棄自甘則是爾等冥頑無知終不能率教也旣負栽培復干咎戾王章具在朕亦不能爲爾等寬矣自茲以往內而國學外而直省鄉校凡學臣師長

皆有司鐸之責者並宜傳集諸生多方董勸以副朕懷否則職業勿修咎亦難追勿謂朕言之不預也爾多士尙敬

聽之

同上

雍正三年議准士子誦習必早聞正論俾德性堅定

將

聖諭廣訓

御製朋黨論頒發各省學政刊刻刷印齎送各學令司鐸之

員朔望宣誦

同上

御製朋黨論

朕惟天尊地卑而君臣之分定爲人臣者義當惟知有君

惟知有君則其情固結不可解而能與君同好惡夫是之謂一德一心而上下交乃有心懷二三不能與君同好惡以至於上下之情睽而尊卑之分逆則皆朋黨之習爲之害也夫人君之好惡惟求其至公而已矣凡用舍進退孰不以其爲賢而進之以其爲不賢而退之惟或恐其所見之未盡當也故虛其心以博稽眾論然必眾論盡歸於至正而人君從之方合於大公若朋黨之徒挾偏私以惑主聽而人君或誤用之則是以至公之心反成其爲至私之事矣孟子論國君之進賢退不肖旣合左右諸大夫國人之論而必加察焉以親見其賢否之實洪範稽疑以謀及

乃心者求卿士庶民之從而皇極敷言必戒其好惡偏黨以歸於王道之蕩平正直若是乎人君之不自用而必欲盡化天下之偏私以成大同也人臣乃敢溺私心樹朋黨各徇其好惡以爲是非至使人君懲偏聽之生奸謂反不如獨見之公也朋黨之罪可勝誅乎我

聖祖仁皇帝御極六十年用人行政邁越千古帝王而大小臣僚未能盡矢公忠往往要朋結黨

聖祖戒飭再三未能盡改朕卽位以來屢加申飭而此風尙存彼不顧好惡之公而徇其私暱牢不可破上用一人則相與議之曰是某所汲引者也於是乎遠之若浼曰吾避

嫌也不附勢也爭懷妒心交騰謗口以媒孽之必欲去之而後快上去一人則相與議之曰是某所中傷者也親暱者爲之惋惜疏遠者亦慰藉稱屈卽素有嫌隙者至此反致其殷勤欲借以釋憾而修好求一人責其改過自新者無有也於是乎其人亦不復自知其過惡而愈以滋其怨上之心是朝廷之賞罰黜陟不足爲重輕而轉以黨人之咨嗟歎息爲榮以黨人之指摘詆訾爲辱亂天下之公是公非作好惡以陰撓人主予奪之柄朋黨之爲害一至是哉且使人主之好惡而果有未公則何不面折廷爭而爲是陽奉陰違以遂其植黨營私之計也書曰予違汝弼汝

無面從退有後言當時君臣告語望其匡弼而以面從後言爲戒夫是故一堂之上都俞吁咈用能賡歌拜颺以成太和之運朕無日不延見羣臣造膝陳詞何事不可盡達顧乃默無獻替而狡猾叵測蓄私見以肆爲後言事君之義當如是乎古純臣之事君也必期致吾君於堯舜而人君亦當以堯舜自待其身豈惟當以堯舜待其身亦當以皋夔稷契待其臣孟子曰責難於君謂之恭陳善閉邪謂之敬吾君不能謂之賊夫以吾君不能而謂之賊則爲君者以吾臣不能亦當謂之忍語云取法乎上僅得乎中苟不以唐虞君臣相期待而區區效法僅在漢唐以下是烏

能廓然盡去其私心而悉合乎大公至正之則哉宋歐陽
修朋黨論剗爲異說曰君子以同道爲朋夫罔上行私安
得謂道修之所謂道亦小人之道耳自有此論而小人之
爲朋者皆得假同道之名以濟其同利之實朕以爲君子
無朋惟小人則有之且如修之論將使終其黨者則爲君
子解散而不終於黨者反爲小人乎設修在今日而爲此
論朕必飭之以正其惑大抵文人掉弄筆舌但求騁其才
每至害理傷道而不恤惟六經語孟及宋五子傳注可奉
爲典要論語謂君子不黨在易渙之六四曰渙其羣元吉
朱子謂上承九五下無應與爲能散其朋黨之象大善而

吉然則君子之必無朋黨而朋黨之必貴解散以求元吉
聖人之垂訓亦旣明且切矣夫朋友亦五倫之一朋黨不
可有而朋友之道不可無然惟草茅伏處之時恆資其講
習以相攸助今旣登朝蒞官則君臣爲公義而朋友爲私
情人臣當以公滅私豈得稍顧私情而違公義且卽以君
親之並重而出身事主則以其身致之於君而尙不能爲
父母有况朋友乎况可藉口於朋以怙其黨乎朕自四十
五年來一切情僞無不洞矚今臨御之後思移風易俗躋
斯世於熙皞之盛故兼聽並觀周諏博採以詳悉世務且
熟察風俗之變易與否而無知小人輒議朕爲煩苛瑣細

有云人君不當親庶務者信若斯言則皋陶之陳謨何以云一日二日萬幾孔子之贊舜何以云好問好察此皆朋黨之錮習未去畏人君之英察而欲蒙蔽耳目以自便其好惡之私焉耳朕在藩邸時坦易光明不樹私恩小惠與滿漢臣工素無交與有欲往來門下者嚴加拒絕

聖祖見朕居心行事公正無私故令纘承大統今之好爲朋黨者不過冀其攀援扶植緩急可恃而不知其無益也徒自逆天悖義以陷於誅絕之罪亦甚可憫矣朕願滿漢文武大小諸臣合爲一心共竭忠悃與君同其好惡之公恪遵大易論語之明訓而盡去其朋比黨援之積習庶肅然

有以懷尊卑之分歡然有以洽上下之情虞廷賡歌颺拜明良喜起之休風豈不再見於今日哉

同上

雍正七年議准令直省各督撫轉飭地方官將

欽定卧碑

御製訓飭士子文敬謹刊刻裝潢成帙奉藏各學尊經閣內

遇督撫等到任及學臣到任接臨於祇謁

先師之日該教官率生員貢監等詣明倫堂行三跪九叩禮畢教官恭捧宣讀令其拱聽如有無故規避者行學戒飭其有居址遙遠者令其輪班入城恭聽宣讀至生員貢監內有唆訟抗糧緣事曾經戒飭者令其

階下跪聽以示懲戒儻該教官不實力奉行或借端
需索奉行不善者許該管上司題參議處

同上

又議准凡恭遇

萬壽聖節元旦冬至丁祭之期其優等生員並貢監等皆
令分班陪列行禮居址稍遠者亦令輪班入城學習
行禮如有高卧不赴參錯驕蹇者行學戒飭至遇督
撫等官到任及學臣按試祇謁

文廟亦令一體遵行并飭令各教官實力奉行不得瞻
徇情面亦不得借端需索

同上

雍正十一年議准凡府州縣

文廟學宮有應行修理之處該地方官據實確估詳明
督撫學政於學租銀內動支修理俟工竣日委員驗
明責令該教官敬謹守護遇有殘缺即會同地方官
查驗詳明酌量修補地方官及教官遇有陞遷事故
離任時將

文廟學宮照

社稷各壇例造入交盤項內接任官驗明並無傾圮出結接
收如有損壞失修之處即行揭報參處

學政全書三

乾隆五年

欽頒太學訓飭士子文

士爲四民之首而太學者教化所先四方於是觀型焉比者聚生徒而教育之董以師儒舉古人之成法規條亦既詳備矣獨是科名聲利之習深入人心積重難返士子所爲汲汲皇皇者惟是之求而未嘗有志於聖賢之道不知國家以經義取士使多士由聖賢之言體聖賢之心正欲使之爲聖賢之徒而豈沾沾焉文藝之末哉朱子同安縣諭學者云學者爲己今之世父所以詔其子兄所以勉其弟師所以教其弟子弟子之所以學舍科舉之業則無爲也使古人之學止於如此則凡可以得志於科舉斯已爾所以孜孜焉愛日不倦以至於死而後已者果何爲而然哉今之士惟不知此以爲苟足以應有司之求矣則無事於汲汲爲也是以至於情游而不知反終身不能有志於學而君子以爲非士之罪也使教素明於上而學素講於下則士子固將有以用其力而豈有不勉之患哉諸君苟能致思於科舉之外而知古人之所以爲學則將有欲罷不能者矣觀朱子此言洵古今通患夫爲己二字乃入聖之門知爲己則所讀之書一一有益於身心而日用事物之間存養省察闡然自修世俗之紛華靡麗無足動念何患詞章聲譽之能奪志哉况卽爲科舉亦無礙於聖賢之學朱子云非是科舉累人人累科舉若高見遠識之士讀

聖賢之書據吾所見爲文以應之得失置之度外雖日日應舉亦不累也居今之世雖孔子復生也不免應舉然豈能累孔子也朱子此言卽是科舉中爲己之學誠能爲己則四書五經皆聖賢之精蘊體而行之爲聖賢而有餘不能爲己則雖舉經義治事而督課之亦糟粕陳言無裨實用浮僞與時文等耳故學者莫先於辨志志於爲己者聖賢之徒也志於科名者世俗之陋也國家養育人才將用以致君澤民治國平天下而囿於積習不能奮然求至於聖賢豈不謬哉朕膺君師之位有厚望於諸生適讀朱子書見其言切中士習流弊故親切爲諸生言之俾司教者

知所以教而學者知所以學

會典事例 三百十一

乾隆十年議准

欽頒訓飭士子文已勒石太學其各省尙未頒發應通行天

下學宮同

聖祖仁皇帝聖諭廣訓

世宗憲皇帝御製朋黨論令教官於朔望日一體宣講永遠

遵行

同上

學額

吉林滿字號

滿蒙 八旗

嘉慶五年設童生每五六名取進

一名廩增額各一名十年一貢

吉林外 紀六

同治初年西

安將軍多隆阿攻克回巢得銀充餉奏加學額五六
取一外定額三名六年捐輸案內滿號暫廣二次每
次額一名十一年添設廩增額各一名五年一貢摺
合字號漢軍嘉慶五年設童生每五六名取進一名
廩增額各一名十年一貢外同治六年捐輸案內五
六取一外加定額二名暫廣二次每次額一名十一
年添設廩增額各一名五年一貢摺
吉林滿合二號應試文章均由各城該管協領衙門
考驗騎射分別滿洲蒙古漢軍旗色佐領造具各童
姓名籍貫清冊呈送將軍考驗

國語騎射發交戶司移送吉林府彙總考試冊報

嘉慶四年議准各處駐防旗人因無就近考試之例
以致蹉跎失學嗣後駐防省分凡遇歲科兩試如有
情願赴考者准其就近考試俟取進後再聽其赴京
鄉試其應如何查照人數多寡酌定學額一切章程
應交禮部酌覈辦理具奏會典事例
三百五
又奏准查在京八旗滿洲蒙古童生額進六十名覈
計近年應試人數約在五六名內取進一名今各省
駐防既准其就近考試入學應令各該學政按照人
數計應試童生亦五六名取進一名如佳卷不敷當

缺無濫如將來人數較多應按人數定額其應行設立廩增數目與出貢年分統俟歲科兩試之後各該學政按照應試人數多寡文風高下咨部再為分別覈定至童生赴考例應廩生保結但現係初次考試尚未經設有廩生應由本佐領具結保送俟該處設有廩生仍照例令廩生保結將佐領保結之例停止其馬步箭應由本處駐防大臣等考試彙送地方官於府考童生時一併考試錄送學政取進同上十三年覆准吉林滿合二號自嘉慶五年科試起至本年歲試共錄取滿合旗童三十六名歲科三屆已

周例應酌覈廩增額數應酌設廩增各二名仍俟食

餼十年後方准出貢同上

吉林府立學之始年遠無考童生額進四名廩增額

各二名五年一貢會典事例二百九十八咸豐五年六年兩次

捐輸加廣定額二名同治六年捐輸又加定額二名

並增設廩增額各二名捐檔

乾隆元年遵奉

恩詔議定奉天遼陽州等學原額七名五名者加二名四名

二名者加一名學政全書六十五

四十三年八月辛巳廣